

明

會

要

明會要卷三十六

永新龍文彬纂

職官八

翰林院下

天順二年正月命李賢等重脩寰宇通志賢嘗謂翰林實文學侍從之臣非雜流可與景泰間陳循輩各舉所私非進士出身者十將四五一時無由而退至是重脩通志惟推擇進士出身者此輩遂知不當居此願補外職賢乃言於上命吏部外除之昭代典則自是專選進士充翰林院遂爲定制王圻通考

成化三年帝以明年上元張鐙命詞臣撰詩詞進奉編修
章懋黃仲昭檢討莊景言頃論臣等撰鼇山烟火詩詞臣
等竊議此必非陛下本懷或以兩宮聖母在上欲備極孝
養奉其歡心耳然大孝在乎養志不可徒陳耳目之玩以
爲養也今川東未靖遼左多虞江西湖廣赤地數千里萬
姓嗷嗷張口待哺此正陛下宵旰焦勞兩宮母后同憂天
下之日至翰林官以論思爲職鄙俚之言豈宜進於君上
伏讀宣宗皇帝御製翰林箴有曰啟沃之言唯義與仁堯
舜之道鄒魯以陳張鐙豈堯舜之道詩詞豈仁義之言若
謂烟火細故不足爲聖德累則舜何必不造漆器禹何必

不嗜旨酒漢文何必不作露臺古帝王慎小謹微必矜細
行者正以欲不可縱漸不可長也伏乞將煙火停止移此
視聽以明目達聰省此貲財以賑饑恤困則災祲可消大
平可致帝以元夕張鐙祖宗故事惡懋等妄言杖之左遷
其官脩撰羅倫先以言事被黜時稱翰林四諫

章懋傳

柯潛爲學士時卽院中後圃構清風亭鑿池蒔芙蓉植二
柏於後堂人稱其亭爲柯亭柏爲學士柏院中有井學士
劉定之所浚也柯亭劉井翰林中以爲美談云

柯潛傳

十三年七月辛未詔翰林院會內閣自考察其屬舊制諸
司官屬考察俱由吏部都察院會覈至是以翰林職居清

要聽其長自覈奏聞

憲章錄

宏治四年給事中涂旦以累科不選庶吉士請循祖制行之大學士徐溥言自永樂二年以來選取庶吉士無定制今後請每科選用令新進士錄平日所作論策詩賦序記等文呈之禮部送翰林考訂擇其詞藻文理可取者按號行取禮部以糊名試卷偕閣臣出題考試於東閣試卷與所投之文相稱卽收預選每科所選不過二十人每選所留不過三五輩將來成就必有足稱者孝宗從其請命內閣同吏禮二部考選以爲常會典

六年詔天下舉才德之士隱於山林者順天府尹唐恂以

潘辰薦吏部以辰生長京師寢之恟復奏給事中王綸夏
昂亦交章薦乃授翰林待詔自天順後漸拘資格布衣無
得預館閣者辰獨以才望得之一時說異數焉

陳濟傳

十年大計京官侍講學士楊守陟時掌院事上言臣與掌
詹事府學士王鏊俱當聽部考察但臣等各有屬員進與
吏部會考所屬則坐堂上退而聽考又當候階下我朝優
假學士慶成侍宴班四品上車駕臨雍坐彝倫堂內視三
品此故事也今四品不與考察則學士亦不應與臣等職
講讀撰述稱否在聖鑒有不待考察者詔可學士不與考

察自守陟始

楊守陟傳

正統間以學士一人在內閣專管誥勅後久不設宏治七年復設至用尙書兼學士如石琚侍郎兼學士如賈詠輩掌管嘉靖六年以張璁議始停不補

夢餘錄

是年九月以桂萼爲禮部尙書仍兼翰林學士故事尙書

無兼學士者自萼始

桂萼傳

升少詹事霍韜爲詹事仍兼翰林學士韜固辭言楊榮楊士奇楊溥以及李東陽楊廷和專權植黨寵翰林爲屬官中書爲門吏故翰林遷擢不由吏部而中書至有晉秩尙書者臣嘗建議翰林去留盡屬吏部庶不陰倚內閣爲腹心內閣亦不陰結翰林爲羽翼議未卽行躬自蹈之而又

躡居學士徐縉上何愧如之上優詔不允

霍韜傳

十月丙寅諭內閣選擇翰林諸臣稱職者留用不稱者量才外補錄實初張璫以議禮拜學士諸翰林恥之不與並列璫深恨及侍讀汪佃講洪範不稱旨帝令補外璫乃請自講讀以下量才外補改官及罷黜者二十二人諸庶吉士皆除部屬及知縣由是翰苑爲空

張璫傳

上旣罷轉翰林多人復諭內閣吏禮二部都察院咨訪有才識文學者量爲推舉改宮僚翰林以廣用人之路乃改大理少卿黃綰南京通政司參議許誥南京尙寶卿盛端明福建按察副使張邦奇四川按察副使韓邦奇山西按

明倫彙編 家範典 第三十二
四
察副使致仕方鵬刑部員外歐陽德吏部主事金璐御史
張袞皆授學士講讀宮坊編修等官實錄

八年四月考選庶吉士大學士楊一清等列上唐順之等
二十人請命官教習得旨以庶吉士之選祖宗舊制誠善
邇來大臣徇私選取市恩立黨於國無益自今不必選留
遂改順之等爲主事等官並限翰林之選侍讀侍講脩撰
各三員編脩檢討各六員著爲令選舉志

十一年十月甲申復考選庶吉士例通紀

十二年七月庚午改主事唐順之陳束楊淪盧淮陳節之
御史胡經周文燭爲編修十月乙酉改主事屠應竣王汝

孝郎中華察爲脩撰

大政記

翰林由別衙門改用者歐陽兼張袞胡經俱以御史改編
脩余舉以給事中改檢討王一甯以工部主事改脩撰歐
陽崇一以刑部郎中改編脩王大任姜儆俱以御史升侍

讀學士

夢餘錄

萬厯九年十一月張居正言前代好文之主皆有文學之
臣奉侍清燕或承詔登朝或應制賡酬皆寓風勸箴規之
益翰林撰述討論爲其職務如日講諸臣皆文學優贍其
餘翰林亦皆需次待用宜令分番入直每日輪四員同日
講諸臣在館祇候萬幾之暇如披閱古文有所采錄或鑒

賞名筆有所題詠卽屬諸臣具草或以不時面賜質問以

觀其才品高下從之

通紀

崇禎十一年帝以國家多故朝臣詞苑起家懦緩不習吏

事無以理紛禦變改舊例擇知推治行卓絕者入翰林

汪偉

傳

祕書監

仍元官

洪武三年三月庚子置祕書監掌內府書籍

六年擢舉人蕭韶爲祕書監直長

十三年七月癸巳罷祕書監所藏古今圖籍改歸翰林院

典籍掌之

已上大政記

文華堂

洪武六年正月擢舉人張唯王輝等十餘人爲翰林院編脩又選國子監蔣學方徵彭通拜給事中俱入禁中文華堂肄業宋濂及脩撰孔克表正字桂彥良爲之師帝聽政之暇輒幸堂中評其文字優劣錫以鞍馬弓矢白金有差

弁山集

宏文館

洪武三年法唐永徽之制置宏文館以胡鉉爲學士命劉基危素王本中睢稼皆兼學士

昭代典則

是年以羅復仁爲宏文館學士復仁在帝前率意陳得失

常操南音帝顧喜其質實呼為老實羅而不名羅復仁傳

九年閏九月罷宏文館大政記

洪熙元年正月建宏文閣於思善門左詔選諸臣有學行者入直命學士楊溥掌閣事帝親授閣印曰朕用卿左右非止助益學問亦欲廣知民事為治道輔有所建白封識

以進三編又殿閣詞林記作宏文館

六月宣宗即位閏七月乙丑罷宏文閣大政記

正德元年王鏊奏請於便殿側脩復宏文館選天下文學行藝著聞者七八人更番入直內閣大臣一人領之如先朝楊溥故事陛下萬幾有暇時造館中講論經史於聖德

自有裨益疏入報聞

明臣奏議系之嘉靖元年按王鏊已於正德三年致仕茲據明政統宗及

大政記

起居注

元給事中兼修起居注

甲辰三月丁卯置起居注以宋濂魏觀爲之日侍左右記

言動

通紀

乙巳六月以儒士滕毅楊訓文爲起居注論之曰起居之職非專事紀錄而已要在訓忠納誨致主於無過之地而後爲盡職吾平時於百官所言一二日外猶尋繹不已今爾在吾左右不可不盡言也

大訓記

復命毅訓文集古無道之君若夏桀商紂秦始皇隋煬帝

所行之事以進曰吾觀此者正欲知其喪亂之由以爲鑒

戒耳

陳脩傳

吳元年魏觀遷兩淮都轉運使入爲起居注

魏觀傳

洪武五年禮部尙書陶凱言漢唐宋時皆有會要紀載時政今起居注雖設其諸司所領諭旨及奏事簿籍宜依會要編類爲書庶可以垂法後世下臺省府者宜各置銅櫃藏之以資稽考俾無遺闕從之

陶凱傳

七年八月宋濂薦僧郭傳授翰林應奉直起居注

王蒙傳

十四年定起居注秩從七品以單仲佑詹同爲之

詞林記

宏治十七年九月復置起居注初洪武間設起居注後廢

至是大僕少卿儲燾言古者史官紀言紀動典至重也臣見陛下宜召羣臣多帷幄造膝之言近臣不得與聞史官莫由紀錄失今不圖恐歲月綿遠傳聞各異無以究其始末乞敕廷臣曾蒙召問者備錄呈覽宣付史館報可三編

世宗初御史黎貫請復起居注之制命詞臣編類章奏以

備纂述從之

黎貫傳

嘉靖十一年學士廖道南言太祖設起居注仁宗開宏文館皆師古者記事記言之制自宣德後相權重史職輕而起居注遂廢今宜選翰林中學識優異者俾兼起居日記言動以至邦有大政民有大眚皆令書之庶克徵信來茲

而史職不爲虛設矣上嘉納之

兩朝憲章錄

萬厯三年編脩張位以前代皆有起居注而本朝獨無疏言臣備員纂脩竊見先朝政事自非出於詔令形諸章疏悉湮沒無考鴻猷茂烈鬱而未章徒使野史流傳用僞亂眞今史官充位無以自效宜日分數人入直凡詔旨起居朝端政務皆據見聞書之待內閣裁定爲他年實錄之助於是大學士張居正議曰國初設起居注官日侍左右紀錄言動實古者左史記事右史記言之制迨後定官制乃設翰林院修撰編修檢討等官蓋以記載事重故設官加詳原非有所罷廢但自職名更定之後遂失朝夕記注之

規以致累朝以來史文闕略邇者纂修實錄臣等祇事總裁凡所編輯不過總集諸司章奏稍加刪潤彙括成編至於仗前柱下之語章疏所不及者卽有見聞無憑增入與夫裨官野史之書海內所流傳者欲事采錄又恐失真是以嘉謀嘉猷實多未備凡此皆由史臣之職廢而不講之所致也今宜申明史職以復舊制令日講官日輪一員專記注起居兼錄聖諭詔敕冊文等項及內閣題稿其朝廷政事見於諸司章奏者俱選年深學優之史官六員專管纂修事分六曹以吏戶禮兵刑工爲次每人專纂一曹俱在朝供職不得別有差遣凡遇常朝御皇極門卽輪記事

官侍班居文武第一班之後近上便於視聽卽古螭頭載
筆之意從之三編

神宗一日顧見史官還宮偶有戲言曰莫使起居聞知聞
則書矣起居之有益於主德如此夢餘錄

修前代史

洪武二年二月詔脩元史以左丞相李善長監脩前起居
注宋濂漳州府通判王禕爲總裁徵山林隱逸之士汪克
寬胡翰宋禧陶凱陳基趙壘曾魯高啟趙汴張文海徐尊
生黃篪王錡傅著謝徽傅恕凡十六人爲纂修

三年二月詔重脩元史復徵四方文學士朱右貝瓊朱廉

王彝張孟兼高遜志李懋李汝張宣張簡杜寅殷弼俞寅
趙壩等十四人爲纂修先是得十三朝實錄惟元統以後
之事未備乃命儒士歐陽佑等往北平山東采遺事至是
還朝重開史局七月丁亥書成凡二百十二卷

已上三編

禮局徐一夔者王禕薦之入史局一夔遺書曰邇者縣令
傳命言朝廷以續修元史見徵且云執事謂僕善敘事薦
之當路私心竊怪執事何惓惓於不材多病之人也僕素
謂執事知我今自審終不能副執事之望何也近世論史
者莫過於日厯日厯者史之根柢也自唐長壽中史官姚
璠奏請撰時政記元和中韋執誼又奏撰日厯日厯以事

繫日以日繫月以月繫時以時繫年猶有春秋遺意至於起居注之說亦專以甲子起例蓋紀事之法無踰此也往宋極重史事日厯之修諸司必關白如詔誥則三省必書兵機邊務則樞司必報百官之進退刑賞之予奪臺諫之論列給舍之繳駁經筵之論答臣僚之轉對侍從之直前啟事中外之囊封匭奏下至錢穀甲兵獄訟造作凡有關政體者無不隨日以錄猶患其出於吏牘或有譌失故歐陽修奏請宰相監修者於歲終檢點修撰官日所錄事有失職者罰之如此則日厯不至譌失他時會要之修取於此實錄之修取於此百年之後紀志列傳取於此此宋氏

之史所以爲精確也元朝則不然不置日厯不置起居注
獨中書置時政科遣一文學掾掌之以事付史館及一帝
崩則國史院據所付修實錄而已其於史事固甚疎略幸
而天厯間虞集做六典法纂經世大典一代典章文物麤
備是以前局之史既有十三朝實錄又有此書可以參稽
而一時纂修諸公如胡仲申陶中立趙伯友趙子常徐大
年輩皆有史才史學厯而成書至若順帝三十六年之事
旣無實錄可據又無參稽之書惟憑采訪以足成之竊恐
事未必覈也言未必馴也首尾未必穿貫也而向之數公
或受官或還山復各散去乃欲以不材多病如僕者承之

於後僕雖欲仰副執事之望曷以哉遂不至

徐一夔傳

成化十年命編纂宋元綱目以閣臣彭時等爲總裁宮坊

翰林劉珏邱濬程敏政劉健楊守陳尹直彭華謝一夔等

爲纂修官分八館未五年而書成

夢餘錄

十一年四月大學士商輅等進所撰宋元通鑑綱目二十

七卷

藝文志

正德二年七月大學士李東陽等進所撰歷代通鑑纂要

九十二卷劉瑾以謄寫不謹欲因是爲東陽罪東陽大窘

焦芳爲解乃止除謄錄官數人名

三編又質實曰是書脩於孝宗時芳未嘗爲總

裁官至是命文華殿改謄芳遂列名其間及進呈書辦官張駿等皆擢顯秩裝潢匠役亦悉授官

嘉靖十五年五月議修宋史南京吏部尙書嚴嵩以賀萬壽節至京師李時請留之命以禮部尙書兼翰林學士董其事

嚴嵩傳

宋史與遼金二史舊分三書嘉靖中柯維騏乃合之爲一以遼金附之而列二王於本紀褒貶去取義例嚴整閱二十年而始成名之曰宋史新編凡二百卷

柯維騏傳

修國史

吳元年四月壬子諭起居注詹同曰國史貴直筆善惡皆當書之昔唐太宗觀史雖失大體然命直書建成之事是欲以公天下也朕平日言行是非善惡汝等皆宜直書不

宜隱諱庶使後世觀之不失其實

大訓記

洪武六年八月學士承旨詹同以渡江以來征討平定之蹟禮樂治道之詳紀載尙未成書請編日厯帝從之命同與宋濂爲總裁官吳伯宗等爲纂脩明年五月日厯成自起兵臨濠至洪武六年共一百卷

昭代典則

建文元年脩太祖實錄以修撰李貫國子監博士王紳教授胡子昭楊士奇訓導羅恢吏目程本立等充編纂官

三編

文彬按洪武脩元史徵山林隱逸之士爲纂脩官建文永樂間脩太祖實錄博士教授訓導吏目及知州知縣等得爲編纂官楊士奇由布衣起家三脩太祖實錄皆

預焉成祖脩永樂大典以布衣陳濟爲都總裁脩撰曾
棨等僅爲之副其始重文學不拘資格如此宣德後專
以脩撰編脩檢討爲史官自是非翰林不得預一代紀
載專屬詞臣矣

成祖初卽位以建文中所脩太祖實錄爲失實乃重脩之
命李景隆茹瑄監脩前纂脩官南昌知府葉惠仲以直書
燕起兵事族誅

三編

永樂九年十月乙巳帝以前監脩官李景隆茹瑄等心術
不正又期限迫促未能精詳復命姚廣孝夏原吉爲監脩
胡廣楊榮楊士奇金幼孜等爲總裁纂脩等官

通紀

十六年

五月庚戌朔實錄成共二百五十七卷起元至正辛卯訖

洪武三十一年戊寅首尾四十八年

藝文志

正統三年四月乙丑楊士奇等進所撰宣宗實錄一百十

五卷士奇楊榮俱進少師楊溥進少保餘進秩有差廷臣

以實錄成進官始此

明紀

成化二年八月閣臣陳文等進所撰英宗實錄三百六十

一卷起宣德十年正月訖天順八年正月首尾三十年附

景泰帝事蹟於中凡八十七卷

藝文志

先是總裁欲革去景

泰帝號引漢昌邑更始爲比編修尹直辨曰實錄中有初

爲大臣後爲軍民者方居官時則稱某官某旣罷去而後

改稱如漢府以謀逆降庶人其未反時書王書叔如故也
豈有逆計其反而卽降從庶人之號者哉且昌邑旋廢景
泰帝則爲宗廟社稷主七年更始無所受命景泰帝則策
命於母后當時定傾危難之中微帝則京師非國家有雖
易儲失德然能不惑於盧忠徐振之言卒從兩宮以至今
日其功過足相準不宜去帝號時不能難

尹直傳

宏治五年大學士邱濬請於文淵閣近地別建重樓將累
朝實錄御製玉牒及關繫國家大事文書盛以銅櫃庋於
樓之上層如詔冊制誥儀注前朝遺文舊事與凡內府衙
門所藏文書可備異日纂脩全史之用者盛以鐵櫃庋之

下層每歲曝書先請委翰林院一員察視事畢封識內外衙門因事欲有稽考者必須請旨不許擅開從之

夢餘錄

正德四年四月壬午李東陽等上所撰孝宗實錄二百二十四卷劉健謝遷既去位焦芳入內閣操史筆凡所褒貶多挾恩怨舊時大臣如何喬新彭韶謝遷輩芳輒肆詆誣李東陽等不敢爲異同故奏表中有傳疑傳信庶以備於將來之語蓋爲芳改竄實錄之張本云

通紀

是年五月內閣援會典請序遷編纂實錄諸臣忽附批調侍講吳一鵬於南京刑部侍讀徐穆於南京禮部編修顧清於南京兵部汪俊於南京工部皆員外郎編修賈詠李廷相於兵部溫

仁和於戶部劉龍於禮部翟鑾董玘於刑部崔銑於南京
吏部陸深於南京禮部檢討王九思於吏部汪偉穆孔暉
於南京禮部易舒誥於南京戶部皆主事始瑾惡翰林官
不下己欲盡出之外爲張綵勸沮及是又持前議綵復力
沮而焦芳父子與檢討段炅輩謂可乘此以擠所不悅者
乃疏名上之瑾愆愆成之謂之擴充政事

三編

嘉靖元年五月癸酉御史盧瓊言景皇帝有撥亂大功而
實錄猶稱郕戾王敬皇帝深仁厚澤而實錄成於焦芳手
是非顛倒乞詔儒臣改纂帝惟命史臣正孝宗實錄之不
當者然亦未有所正也

馬錄傳

四年三月大學士費宏言獻皇帝嘉言懿行舊邸必有成書宜付史館纂脩實錄從之明年六月丙子實錄成凡五

十卷

明紀

文彬按有明一代闕典如建文景泰二帝君臨天下數年不得入廟並不得脩實錄世宗以制作自任未議及此獨徇私恩於興獻不但稱宗祔廟亂一朝之祀典且纂脩實錄紊千秋之史體費宏之請徒欲阿徇上意不顧貽譏千秋而廷臣懲議禮之禍無復規諫殊可嘆也六月庚子費宏等上所撰武宗實錄一百九十七卷

藝文志

檢討席春尙書書弟也預脩實錄成當進秩內閣費宏以

春由他官入與檢討劉夔並擬按察僉事夔亦故御史以
避兄侍郎龍改授者也書大怒疏言故事無纂脩書成出
爲外任者帝以書故留春擢脩撰而夔亦留擢編修席書傳
十三年建皇史宬於重華殿西以藏列朝實錄實訓每纂
脩告成焚稿椒園正本貯此錄夢餘

隆慶二年王世貞奏太祖實錄洪武三十一年止中間至
永樂元年尙有關漏未載夫漢不以呂氏而廢本紀唐不
以武氏而廢實錄明天下不可一日無史也乞下內閣諸
耆碩臣考究革除年間事蹟別爲一書附之國史之末疏

入不納

明臣奏議

萬厯初穆宗實錄成于慎行進修撰充日講官故事率以翰林大僚直日講無及史官者慎行與張位及王家屏沈一貫陳于陞咸以史官得之異數也

于慎行傳

十六年司業王祖嫡請復建文位號脩輯四年事蹟盡廢野史不經之說其景泰宜自爲一錄削郕戾舊名疏下羣臣議於是禮部尙書沈鯉奏言建文以革除而稱洪武景泰以分附而並系英宗皆爲我朝缺典所據司業王祖嫡有循史職脩缺典之奏臣等不敢爲更張之議惟將英廟實錄中間七年事蹟名曰恭仁康定景皇帝實錄無相混淆至於建文位號詔書中原無降削之文今亦無憑議復

亦惟於高廟實錄之末摘出四年事蹟復稱建文年號如
斯而已詔從之然卒不果行文彬按沈鯉覆祖嫡之疏諸書未載見明臣奏議系之萬曆十三年三編載輔臣申時行覆祖嫡疏在十六年三月當時下羣臣議內閣禮部必同時覆奏明史鯉本傳有十六年請復建文年號重定景帝實錄云云證之明通紀亦同宜系之十六年

十七年遂中立疏伏見輔臣王錫爵題請纂修正史起原
任詹事劉虞夔充總裁官輿論嘖嘖以爲匪人竊維修史
鉅典必博訪名流廣招俊士前輔臣疏有欲取之別署取
之外僚取之間廢取之山林隱逸而必曰文行兼優又曰
行義無虧今乃授其門人虞夔首預總裁之選儻誤蒙收
錄則脩史之典適以啟邪臣奔競之途何足以昭法戒而

垂萬世伏望諭輔臣及吏部嚴行諮訪務求端方直亮博聞有道術之士毋得濫及匪人以污盛舉從之

明臣奏議

二十二年三月癸卯詔脩國史先是禮部尙書陳于陞疏言宋眞宗祥符間王旦等撰進太祖太宗兩朝正史仁宗天聖間呂夷簡等增入眞宗朝名三朝國史此則本朝君臣自脩正史之明證也我朝史籍止有列聖實錄正史闕焉未講伏覩朝野所撰次可備采擇者無慮數百種若不及時網羅歲月旣久卷帙散脫欲成信史將不可得惟陛下立下明詔設局編纂以成萬世不朽盛事詔從之

陳于陞傳

脩撰焦竑言國朝實錄代脩如建文景泰二朝向無專紀

景帝位號雖復而實錄附載未經改正夫勝國之君代必爲紀所謂國可滅史不可滅也況在本朝乃使孫蒙祖號弟襲兄年名實相違傳信何據此所當勅爲者一也德懿熙仁四祖本朝發祥之始列於高廟本紀之首如漢高之述太公光武之述長沙已無可議至睿宗獻皇帝似當一遵此例不必另紀蓋位終北面猶人臣之列事屬追王無編年之體此所當附見者二也或當分而不宜合或當合而不必分蘭臺石室之中自有定論但須經聖斷乃可遵

行夢餘錄

二十三年九月乙酉詔以建文朝事附國史太祖本紀末

復其年號時給事中楊天民御史牛應元言建文年號不宜革除見值纂修國史當更正洪武三十二年至三十五年號以復建文元二三四年之舊禮部議從之故有是命

二十五年六月癸未以皇極門左右兩廊被災閣臣張位等請停止國史纂修事務從之

已上實錄

泰昌元年十一月詹事公鼐言近聞南北臣僚論先帝升遐一事亦多怪異語多隱藏恐因委巷之譌傳流爲香山之稗說臣竊痛焉夫臣子愛君存其眞不存其僞今實錄纂修在即請將先帝事蹟別爲一錄凡一月間明綸善政

固大書特書其有見聞異詞及宮闈委曲之妙用亦皆直筆指陳勒成信史臣雖不肖竊敢任之疏入不許

公孫傳

天啟二年脩神宗實錄命太常卿董其昌往南方採輯先朝章疏及遺事其昌廣搜博徵錄成三百本又採留中之疏切於國本藩封人才風俗河渠食貨吏治邊防者別爲四十卷倣史贊之例繫以筆斷書成表進有詔褒美宣付

史館

董其昌傳

魏忠賢既輯三朝要典以光宗實錄所載與要典左乃言葉向高等所脩非實宜重脩遂恣意改削牴牾要典者崇禎改元毀要典而所改光宗實錄如故六年少詹事文震

孟言皇考實錄爲魏黨曲筆當改正從原錄時溫體仁當國與王應熊等陰沮之事遂寢庶子許士柔曰若是則要典猶弗焚矣乃上疏曰皇考實錄總記於世系獨略皇上娠教之年聖誕之日不書也命名之典潛邸之號不書也聖母出何氏族受何封號不書也此皆原錄備載而改錄故削之者也原錄之成在皇上潛邸之日猶詳慎如彼新錄之進在皇上御極之初何以率略如此使聖朝父子母后兄弟之大倫皆闕而不明缺而莫考其於信史謂何疏上不省體仁令中書官檢校穆宗總記示士柔士柔具揭爭之曰皇考實錄與列聖條例不同列聖在位久登極後

事編年排纂則總記可以不書皇考在位僅一月三后誕育聖躬皆在未登極以前不書之總記將於何書也穆廟大婚之禮皇子之生在嘉靖中故總記不載至於冊立大典編年未嘗不具載也皇考一月易世熹廟之冊立當書皇上之冊封獨不當書乎已復上疏曰累朝實錄無不書世系之例臣所以挾摘改錄正謂與累朝成例不合也孝端皇后皇考之嫡母也原錄具書保護之功而改錄削之何也當日國本幾危坤甯調護真孝慈之極則顧復之深恩史官不難以寸管抹掇之此尤不可解者也疏上報聞

許士
柔傳

崇禎九年禮科給事中馮元飈奏我朝列聖以來雖御世
長久事蹟繁重實錄之成無踰至數年者今熹廟之政前
後七載實錄至今未成後世將何所取信乞敕所司將實
錄寶訓立行竣役有不公者廷臣據實糾正按治如法餘
錄

文震孟疏臣備員史局頃因纂修熹宗實錄從閣中恭請
光宗實錄副本校對見其間舛誤甚多而悖謬之大者如
先帝之冊立與挺擊紅丸大事皆祖三朝要典之邪說而
應和之蓋天啟三年七月十六日實錄進呈則禮臣周炳
寰等所纂修而閣臣葉向高韓爌等所總裁者也至天啟

六年逆黨崔呈秀請旨重修則崇禎元年二月十七日所
進今皇史宬之所藏者也是時皇上初登大寶逆案未成
閣臣黃立極含糊從事後來諸臣無復洗石渠之穢使流
傳後世何所取衷國史所關良非細故臣謹摘其悖謬之
甚者乞敕史館逐一改正或取天啟三年所進遺稿再加
勘定入皇史宬庶千古之是非不悖一代之褒鉞可憑上同
初天啟時詔脩光宗實錄禮部侍郎周炳謨載神宗時儲
位艱疏及妖書挺擊諸事直筆無所阿其後忠賢盜柄御
史石三畏劾削炳謨職忠賢使其黨重脩是非倒置故震
孟摘尤謬者數條疏請改正帝特御平臺召廷臣面議卒

爲溫體仁王應熊所沮

文震孟傳

明會要卷三十六終

明會要卷三十七

永新龍文彬纂

職官九

六科

元給事中
不分科

吳元年置給事中洪武六年正月以舉人傅宗巖崔莘爲
給事中又選國子監蔣學方徵彭通宋善王惟吉鄒傑等
拜給事中入禁中文華堂肄業三月己巳始分爲吏戶禮
兵刑工六科各設給事中二人鑄給事印一推年長者掌
之九年定給事中十人十年隸承敕監十二年改隸通政
司十三年六月丁丑置諫院左右司諫以耆儒劉埴關賢

爲之左右正言以耆儒趙肅何顯周爲之置諫議大夫以唐鐸爲之尋皆罷二十二年三月改給事中爲源士先是以魏敏卓敬等八十一人適符古元士之數改爲元士尋以六科爲政事本源改爲源士未幾復爲給事中二十四年五月改定科員每科都給事中一人正八品左右給事中二人從八品給事中共四十人正九品建文中革左右給事中增設拾遺補闕成祖復舊制

王圻通考

洪武十七年九月給事中張輔言自九月十四日至二十一日八日之間內外諸司奏劄凡一千一百六十計三千二百九十一事上曰朕日總萬幾豈能一一周遍苟政事

有失將爲天下害卿等能各悉心封駁則庶事自無不當

此六科稽查號件封駁章奏之例也

夢餘錄

六科衙門在甌城內尙寶司西永樂中災暫於午門外直房署事至今仍之

王圻通考

永樂元年九月高唐州民王政建言治道擢刑科給事中

大政記

十一月命六科辦事官言事上初卽位欲周知民隱

命吏部尙書蹇義等凡郡縣考滿至京選其識達治體者令於六科辦事俾各言所治郡縣事卒無言者上諭給事中朱元貞等曰郡縣豈無一事可言今在朕左右尙默然况遠在千萬里外乎卿等可以朕意論之何利當興何弊

當革皆勿隱若今不言有他人言之則無所逃罪矣

昭代典則

二年三月己巳召都給事馬麟等諭曰爲治貴得大體比爾等疏駁奏牘一字之誤皆喋喋以言瑣碎甚矣吏治文書叢脞積累其精力有時而敝難免錯誤自今奏內有數目月日等字錯誤者皆令從傍改注用印蓋之不必以聞

大訓

記

七年閏四月戊申諭尙書蹇義等皇太子所決庶務令六

科逐月類奏以聞

通紀

仁宗卽位命給事中蕭奇等三十五人爲州縣官擢監生

徐永潛等二十人爲給事中

本紀

洪熙元年擢訓導李居傑李蕃爲給事中

大政記

宣德元年七月諭六科凡中官傳旨必覆奏始行

本紀

正統中給事中張固言六科都左右給事中員缺乞選各科年資深者以次升補英宗謂吏部臣曰給事中乃近侍之官凡朝廷政令得失軍民休戚百官邪慝舉得言之况都左右給事中爲之領袖非識達大體者不可畀也固乃欲循資格而用之不亦舛乎

夢餘錄

景泰三年三月命都左右給事中居御史左

大政記

成化二十一年因星變求言都給事中李俊等上疏曰今之弊政最大且急者曰近倖干紀也大臣不職也爵賞太

濫也工役過煩也進獻無厭也流亡未復也天變之來率由於此夫內侍之設國初皆有定制今或一監而叢一二十人或一事而參五六七輩或分布藩郡享王者之奉或總領邊疆專大將之權或依憑左右援引憚邪或交通中外投獻奇巧司錢穀則法外取財貢方物則多端責賂兵民坐困官吏蒙殃殺人者見原償事者逃罪如梁芳韋興陳喜輩不可枚舉惟陛下大施剛斷無令干紀奉使於外者悉爲召還用事於內者嚴加省汰則近倖戢而天意可回矣今之大臣其未進也非夤緣內臣則不得進其既進也非依憑內臣則不得安此以財貿官彼以官鬻財無怪

其漁獵四方而轉輸權貴也如尙書殷謙張鵬李本侍郎
艾福杜銘劉俊皆旣老且懦尙書張鑒張瑄侍郎尹直大
理寺卿田景暘皆清論不愜惟陛下大加黜罰勿爲姑息
則大臣知警而天意可回矣夫爵以待有德賞以待有功
也今或無故而爵一庸流或無功而賞一貴倖祈雨雪者
得美官進金寶者射厚利方士獻煉服之書伶人奏曼延
之戲掾史胥徒皆叨官祿俳優僧道亦玷班資一歲而傳
奉或至千人數歲而數千人矣數千人之祿歲以數十萬
計是皆國之命脈民之脂膏可以養賢士可以活饑民誠
可惜也方士道流如左通政李孜省太常少卿鄧常恩輩

尤爲誕妄此招天變之甚者乞盡罷傳奉之官毋令汙玷
朝列則爵不濫而天意可回矣今都城佛刹迄無甯工京
營軍士不復遣力如國師繼曉假術濟私糜耗特甚中外
切齒願陛下內惜貲財外惜人力不急之役姑賜停罷則
工役不煩而天意可回矣近來規利之徒率假進奉以耗
國財或錄一方書市一玩器購一畫圖製一簪珥所費不
多獲利十倍願陛下洞燭此弊留府庫之財爲軍國之備
則進獻息而天意可回矣陝西河南山西赤地千里屍骸
枕藉流亡日多萑苻可慮願體天心之仁愛憫生民之困
窮追錄貴倖鹽課暫假造寺貲財移賑饑民俾苟存活則

流亡復而天意可回矣夫天下譬之人身人主元首也大
臣股肱也諫官耳目也京師腹心也藩郡軀幹也大臣不
職則股肱痿痺諫官緘默則耳目塗塞京師不戢則腹心
受病藩郡災荒則軀幹削弱元首豈能晏然而安哉伏望
陛下聽言必行事天以實疏斥羣小親近賢臣咨治道之
得失究前代之興亡以聖賢之經代方書以文學之臣代
方士則必有正誼足以廣聖學讜論足以究天變而手足
便利耳目聰明腹心安泰軀幹強健元首於是乎大明矣
帝優詔答之降攷省上林丞常恩本寺丞繼曉革國師爲
民令巡按御史追其誥敕制下舉朝大悅

李俊傳

大學士商輅疏見任春坊司直郎林聰歷任刑科都給事中眾皆推服今升司直郎固是善職然政務頗簡未免以有用之才置於閒散之地望降旨著林聰兼吏科都給事中管事品秩仍舊於事體無損於政務有益

憲宗諭六部臣曰自今各衙門一應奏題旨意卽明白覆奏發落毋得稽緩五日內不覆奏者該科劾之

宏治六年諭今後三年朝覲之年科道官必待吏部考察後有失當方許指名糾劾此計後拾遺之例也

已上夢餘錄

十五年令給事中以博士行人兼選又令給事中照御史

例選歷練老成者充補

會典

正德元年十二月丁巳命錦衣衛官點閱給事中

本紀

嘉靖二年二月丙戌都察院疏請差御史巡鹽不下閣票擬批答稍誤戶科給事中黃臣諫曰我朝設立內閣凡百章奏先行票擬今使內閣虛代言之職中貴肆專擅之奸關繫匪細漸不可長容臣封還原本以重命令疏入卽加批如制

夢餘錄

四年仁壽宮災禮科給事中楊言言朝廷設六科所以舉正欺蔽也今吏科失職致陛下賢否混淆進退失當大臣蔣冕林俊輩去矣小臣王相張漢卿輩皆得禍矣而張璁桂萼始由捷徑以竊清秩終怙威勢以賊良善戶科失職

致陛下儉德不聞而張崙輩請索無厭崔和輩敢亂舊章
禮科失職致陛下享祀未格於神而廟社無帡幪之庇兵
科失職致陛下綱紀廢弛而錦衣多冒濫之官山海攘抽
分之利匠役增收而不禁奏帶踰額而不裁刑科失職致
陛下刑罰不中元惡如藍華輩得寬籍沒之法諍臣如郭
相輩反施桎械之刑工科失職致陛下興作不常局官陸
宣輩支俸踰於常制內監陳林輩抽解及於蕪湖凡此皆
時弊之急且大而足以拂天意者願陛下勤修庶政而罷
臣等以警有位庶可以格天心弭災亂

楊言傳

九年夏言奏六科額設都左右給事中給事共五十八員

祖宗以來額員俱備後來有不盡補者然遇都左右給事中缺五員以上則必奏請升補各科給事缺十五六員以上則必奏請選補永著爲例在先朝五十八員一時補足當時侈爲美談今六科在任止二十一員共缺三十七員六科除都左右給事中外惟給事中四員而已祖宗舊規凡給事中有缺止於進士年三十以上者考選奏補宏治閒始以行人博士兼選正德閒始以在外推官知縣照御史例選補末年大臣畏忌新進敢言始廢進士考選之例陛下登極之初命今後照依舊例給事中有缺於進士考選奏補御史有缺進士與行取人員相兼考選然應詔一

行而旋復寢今請將見在各衙門辦事進士及歷俸二年
以上行人博士並推官知縣三年考滿到部者查照舊規
從公考選上嘉納之

明臣奏議

三十三年春正月壬寅朔以賀疏違制杖六科給事中於
廷先是三十二年正月朔以賀表語乖文體逮禮科給事
中楊思忠於午門外杖之百罷爲民六科官各奪俸一月
至是以賀表中失擡萬壽字詔錦衣衛逮六科給事中張
思靜等各廷杖四十

三編

萬厯間選六科給事中多未愜人望編脩張元禎言當以
器識宏大學問該博文章優贍者充之不必拘體貌長大

議者以不拘體貌一言有礙遂不果行

春明夢餘錄

陸容曰六科係近侍官兼主奏對必選體貌端厚語言的確者以壯觀班行表儀朝亡但前居此地者體貌非不端厚而其器識學問文章往往過人蓋出自精選號爲得人如姚夔葉盛尹旻張甯輩是已以後則專以體貌爲主而其所重者反不之計所謂出題考選不過虛應故事使爲吏部者以公天下爲心選缺時選體貌豐偉音吐正當者五倍其數試其奏議彈文數篇每五六人中取其優者奏上如此而不得人吾未之信也

通典

崇禎中刑科右給事中左懋第疏臣接錦衣衛所傳紅本

乃逃帥楊德政奉旨正法也臣密緘同駕帖還之矣又捧御筆緘函發科者卽此本也臣又密緘藏之垣中矣臣思此本之爲密封者原恐此機一洩罪帥或自引裁而不得行法今其人已誅自當明正其罪使國人知之乞敕下發鈔以便遵行

刑科給事中孫承澤疏臣於辛未觀政戶部猶見紅本發下各部司官輪流接替日當晡時內臣捧至會極門東廡各官挨次接領體統嚴肅臣初入掖垣事猶如故邇因機務殷繁發無定時於是六曹不復接本或早或暮但憑會極門內臣發之錦衣直房直房散與各垣吏役失當年之

制臣按祖宗朝凡紅本發科猶必令部堂一員親至垣中畫本尾署小押所以防姦杜弊如此其嚴也况未到科之前收受一憑下役豈所以重王言而尊典制

崇禎二年上諭六科爾等表裏六曹舊有註銷之例今再行申飭各掌印官選委給事中一員查理六曹奉旨應行事件勒限奏報少有違玩糾劾責治爾等自隳職掌一併究處

已上夢餘錄

國子監

元國子監
隸集賢院

吳元年定國子學官制

十五年三月庚戌朔改爲國子監二十四年正月己丑更

定國子監品秩員數

職官志

祭酒 一人正四品吳元年置以許存仁爲之

八年起前湖廣參政陶凱爲祭酒

本傳

十三年起前兵部尙書樂韶鳳拜祭酒

本傳

十四年徵前刑部尙書李敬拜祭酒

劉崧傳

十五年罷祭酒李敬吳顥命禮部尙書任昂增定監規八

條遂以李文忠宋訥兼領國子監事

任昂傳

十六年正月己巳朔以宋訥爲祭酒敕諭之曰大學天下

賢關禮義所由出人材所由興卿夙學者德故特命爲祭

酒尙體朕立教之意士習丕變國家其有賴焉

職官志

訥爲祭酒時功臣子弟皆就學及歲貢士嘗數千人訥爲嚴立學規終日端坐講解無虛晷夜恆止學舍十八年復開進士科取士四百七十有奇由大學者三之二再策士亦如之帝大悅製詞褒善

宋訥傳

二十四年二月擢景州學正胡季安試祭酒

昭代典則

永樂二年胡儼以內閣拜祭酒遂不預機務時用法嚴峻國子生託事告歸者坐戍邊儼至卽奏除之

本傳

明年正月

儼請申明洪武學規從之

大政記

正統六年李時勉爲祭酒列格致誠正四號號房訓勵甚切崇廉恥抑奔競別賢否示勸懲諸生貧不能婚葬者節

省餐錢爲贍給督令讀書鐙火達旦吟誦聲不絕人才盛
於昔時英國公張輔暨諸侯伯奏願偕詣國子監聽講帝
命以三月三日往時勉升師席諸生以次立講五經各一
章畢事設酒饌諸侯伯讓曰受教之地當就諸生列坐惟
輔與抗禮諸生歌鹿鳴之章賓主雍雍盡幕散去人稱爲

太平盛事

李時勉傳

陳敬宗由南京司業遷祭酒以師道自任立教條革陋習
六館士千餘人每升堂聽講設饌會食整肅如朝廷稍失
容卽令待罪堂下與李時勉同時爲兩京祭酒稱南陳北

李

陳敬宗傳

景泰三年劉鉉遷祭酒時以國計不足放遣諸生不願歸者停其月廩鉉言養才國家急務今倉廩尙盈奈何靳此遂得復給又令甄別六館生年老貌寢學藝疏淺者斥爲民鉉言諸生荷教澤久豈無片長况離親戚棄墳墓艱苦備至一旦被斥非朝廷育才意乞揀年貌衰而有學者量授之官帝可其奏

劉鉉傳

成化二年邢讓爲祭酒慈懿太后崩議祔廟禮讓率僚屬疏諫兩京國學教官例不得遷擢讓等以爲言由科目者滿考得銓敘讓在大學力以師道自任脩辟雍通志督諸生誦小學及諸經痛懲謁告之弊

邢讓傳

六年七月周洪謨爲南京祭酒上言南監有紅板倉二十
間高皇后積粟以養監生妻孥者宜脩復帝允行之十一
年改北監言士風澆漓請復洪武中學規帝納其言命禮
部榜諭於國子監崇信伯費淮怠不就學洪謨劾之奪冠
帶以儒巾赴監停歲祿之半學政肅然

周洪謨傳

宏治初林瀚遷國子監祭酒進禮部右侍郎掌監事如故
典國學垂十年饌銀歲以百數計悉貯之官以次營立署
舍師儒免僦居由瀚始自瀚及季子庭機孫燦三世爲祭
酒前此未有也

林瀚傳

十五年南監缺祭酒以章懋補之始涖任六館士人人自

以爲得師監生尤樾母病例不得歸省晝夜泣懋遣之歸

曰吾甯以違制獲罪

章懋傳

嘉靖中祭酒姜寶請罷納粟例復積分法又請令公侯伯子弟及舉人盡入監肄業詔皆從之

姜士昌傳

故事祭酒每視事則二生共舉一牌詣前大書整齊嚴肅四字蓋高皇帝所製以警師儒者祭酒李廷機見之惕然故其立教一以嚴爲主

李廷機傳

司業 一人正五品吳元年置以劉承直爲之

洪武十四年徵前吏部尙書劉崧爲司業

劉崧傳

二十六年升滑縣訓導宋復祖爲司業

大政記

司業王嘉會龔敷

時有左右兩司業

與祭酒宋訥嚴立楷範三人

春秋高鬚鬢皓如旦夕端坐諸生雲集階下肅然望而畏

之以是士類率教多所造就

續通典

宣德九年省司業宏治十五年復設

職官志

文彬按正統中司業趙琬

李時勉傳

成化中司業張業

邢讓傳

又耿裕成化中爲司業

本傳

皆在宣德後宏治前職官志

云宣德九年省司業宏治十五年復設疑有誤

成化十年司業耿裕以勳戚子弟肄業監中當先束身體

法乃采輯古諸侯貴戚言行可師者人授一編帝聞而稱

善

耿裕傳

監丞 一人正八品洪武十五年置掌繩愆廳之事以參
領監務堅明其約束諸師生有過及廩膳不潔並糾懲之
而書之於集愆冊

職官志

張顯爲國子學正秩滿升監丞涖事公勤六館皆敬重之
乃條陳百務成法益備時北監初建唯司業貝泰署印教
尼不行朝議以顯素諳典章乃奏改北詔報可遂兼程以
往經理學舍勸懲淑慝百廢畢興輔泰所不逮

王圻通考

建文中升監丞爲堂上官成祖復舊制

博士 正七品太祖乙巳置後定爲五經博士五人掌分
經教授而時其考課改爲從八品

洪武二年四月己巳命博士孔克仁授諸子經大訓記

六年趙俶除國子博士帝嘗御奉天殿召俶及錢宰貝瓊等曰汝等一以孔子所定經傳爲教慎勿雜蘇秦張儀縱橫之言諸臣頓首受命俶因請頒正定十三經於天下屏戰國策及陰陽讖卜諸書勿列學宮趙俶傳

宣德五年九月甲寅升北京國子監博士汪奉許子謨爲翰林院檢討以後國子官滿三考者升秩翰林仍理監事

大政記

嘉靖中李默掌南京國子監事博士等官得與科道選自

默發之李默傳

助教

十六人

學正

十人

學錄

七人

掌六堂之訓誨士

子肄業本堂則爲講說經義文字導約之以規矩

職官志

洪武時張美和聶鉉貝瓊等皆名儒先後爲博士助教學

錄以故諸生多所成就

宋訥傳

林大猷舉鄉薦遷學錄勤於啟迪執經從遊者無慮數百

輪翻聽講又約日通集大學諸生聽講謂之普講進監丞

滿九載升檢討仍管監丞事

續通典

李成梁孫以都督就婚魏國公徐宏基家騎過文廟門學

錄李維極執而扶之李氏蒼頭數十人蹋邸門宏基亦至

南京祭酒郭正域曰今天子尙皮弁拜先聖人臣乃走馬

明倫彙編 家範典 第三十一
廟門外乎且公侯子弟入學習禮亦國子生耳學錄非扶
都督也令交相謝而罷郭正域傳

雜錄

洪武六年正月庚申禮部奏增國子生上曰須先擇國子
學官師得其人則教養有效非其人增廣徒多何益今祭
酒乏人卿等宜詢求才德兼備者以名聞大訓記

初國學主祭遣祭酒後遣翰林院官然祭酒初到必遣一
祭洪武十七年敕每月朔望祭酒以下行釋菜禮禮志

永樂二年四月己亥禮科言國子監祭酒徐旭書奏不謹
當降上問吏部尙書蹇義旭爲人何如義對曰有文學持

守而於人寡合上曰持守之人固當寡合况兼有文學宜置之近侍遂命爲翰林院修撰

大訓記

仁宗初諭吏部曰比國子生務實學者少皆由師範失職所致緣引選國子監官率循資升授不聞舉有道老成之士如大學何自今其慎選以充

明政統宗

明初祭酒司業擇有學行者任之後皆由翰林院官遷轉

職官志

成化七年二月祭酒司業缺尙書姚夔言國子養賢之地風化所關祖宗朝如宋訥劉崧及胡儼陳敬宗李時勉俱師範可尊近年人不以此官爲重居是官者亦不知所以

自重以致監規廢弛放肆無忌乞命禮部申飭監規并慎簡祭酒司業俾作新風化庶於治道有賴於是舉李紹爲祭酒耿裕爲司業從之

昭代典則

孝宗踐阼將建櫻棚於萬歲山有大學生虎臣上疏切諫祭酒費閭懼禍及銀鐙繫臣堂樹下俄官校宣臣至左順門傳旨慰諭曰若言是櫻棚已毀矣閭大慙臣遂名聞都

下

高瑤傳

崇禎二年正月帝臨雍祭酒孔貞運進講書經唐貞觀時祭酒孔穎達講孝經有釋奠頌孔氏子孫以國師進講至貞運乃再見帝以聖裔故從優賜一品服

張至發傳

明會要卷三十七終